

Kontuola

ANTZUOLA / Egubakoitza / 2004eko azaroaren 26a / 224. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Kongoren aldeko festa egingo du Anelkarrek


AINTZANE IRIZAR

Bihar, zapatua, Elkartasun Festa egingo du Anelkarrek, Kongorako dirua batzeko. 19:00etatik aurrera izango da hori, Zurrategiko plazan. Argazki erakusketa, jolasak eta Bidezko Merkataritzako produktuak egongo dira hantxe, besteak beste.

Anelkarrek antolatutako Elkartasun Festaren helburua izango da, batetik, Kongoko Kansenia herrirako dirua batzea, eta bestetik, herritarrei herri horretako egoeraren berri ematea.

Andres eta Bittor Arbulu, azkeneko urteotan, urtero egon dira Kongoko Kansenia herrian; lehenengo, herri horretara ura ekartzeko azpiegiturak egiten ibili ziren. Horretarako dirua batzen ibili ziren Anelkarkoak orduan. Orain, berriz, Kanseniako herritarren lehenetasuna da eskola berriak eraikitzea.

Ibarreko 15 herritako umeendako lehen hezkuntzako eskola berria eraikiko dute Kanseniak. Eskola berria eraikitzeko bakarrik ez, ikasturtea ordaintzeko ere behar dute dirua.



BITTOR ARBULU

Iaz Antzuolatik bidalitako diruarekin egin zituzten eskolako mahaiak.

Kanseniako umeendako eskola egiteko izango da bihar batzen duten dirua

EKITALDI UGARI

19:00etan hasiko dituzte ekitaldiak, Zurrategin. Jokin eta Josu trikitilarien saioa; Kongoko proiektuen argazki erakusketa; Bidezko Merkataritzako produktuaren salmenta postua; toka eta igelaren jolasak; pintxoak, txokolata eta ardoa dastatzeko aukera. Ekitaldi horiek izango ditugu.

Zirkulazioan, aldaketak

Astelehena ezkerreko hainbat aldaketa egin dituzte. Aipagarrienak dira kale nagusietan egin dituztenak: Kalebarrengo zubi paretik plaza-raino, noranzko bakarra du bideak, behetik goranzkoa, hain zuzen ere. Bestalde, plazatik Buztinzuri eta Kalegoi aldera ere behetik gora bakarrik joan gaitezke orain. Arazo gehien sortu dituen tokia da Sagastitik Kalegoirako bidea, bi noranzko dituelako; Udalak beharrezkoa ikusten du toki horretan hainbat hobekuntza egitea. /A.I.

PAUSOKA

Aukeratu dituzte batzordekide berriak

A.I.

Martitzenean, hilak 23, egin zuen Pausoka gurasoen elkarteak urteko batzar orokorra; baita ez ohiko batzarra ere, estatutuko hainbat puntu aldatzeko.

Urteko batzarrean, ohikoa den moduan, urteko diru kontuen berri eman zuten, urtean zehar antolatu zituzten ekitaldien berri eman zuten eta balorazio positiboa egin zuten, gainera.

Bestalde, elkarteko zuzendaritza berri egin zuten. Hamar lagunek osatzen dute zuzendaritza batzordea. Horietatik bost

lagunek laga egin zuten batzordea eta beste bostek jarraitu egingo dute. Horrela, bost batzordekide berri aukeratu zituzten martitzeneko batzarrean.

Honako bostak dira batzordekide berriak: Iñigo Irizar, Mari Karmen Iturbe, Junkal Bakalkoa, Yolanda Miner eta Garbiñe Lizundia. Lehendik jarraitzen dutenak, berriz, honakoak dira: Andoni Balerdi, Arantxa Lizarralde, Jon Legorburu, Juan Antonio Araiztegi eta Patxi Martin. Orain, euren erabaki behar dute zein izango den elkarteko presidente berria.

LABUR

Santa Zezilia musikarien zaindariaren ospakizunak egingo dituzte etzi, domeka

Astelehenean, hilak 22, izan zen Santa Zezilia musikarien zaindariaren eguna. Herriko txistulari taldeak kalejira egin zuen egun horretan, baina, ez zuten bestelako ospakizunik egin. Domekan, berriz, mezaren ondoren abesbatzak emanaldia egingo du elizpean, eta horren ondoren luntxa egingo dute.

'Troya' eta 'Asterix eta Kleopatra' filmak eskainiko dituzte oraingo asteburuan

Gaur, egubakoitza, helduendako filma eskainiko dute Olaran etxeko aretoan; *Troya* filma, hain zuzen ere, ikusi ahal izango dugu, 22:00etan. Domeka arratsaldean, berriz, umeen txanda izango da; *Asterix eta Kleopatra* euskarazko filma eskainiko dute, 17:00etan.

Kinto afaria egingo dute 1975ean jaiotakoek datorren abenduaren 11n

Abenduaren 11n, zapatua, kinto afaria egingo dute 1975ean jaiotakoek. 19:00etan elkartuko dira Larrea tabernan, eta Zumarragara joango dira ondoren; hantxe, Balentiña jatetxean egingo dute afaria. Parte hartu nahi dutenek Alaitz Jauregiri edo Julen Gariñanori jakinarazi behar dute, abenduaren 2a baino lehen.

Gazte mailako futbol taldea oso ondo dabil, eta sailkapeneko bigarren postuan dago

Ekintza taldeko liderrarengandik puntu bakarrera dago Antzuolako gazte mailako futbol taldea; 16 puntu dituzte antzuolarrek eta 17 puntu Ekintza taldeak. Bost jardunaldi besterik ez da geratzen liga amaitzeko. Orain arte jokatu dituzten zortzi partiduetatik bost irabazi, bi galdu eta bat berdindu dute antzuolarrek.



ANTZERKIA

'Inaxitoren ametsak' umeendako antzezlan, zapatuan

ANTZANE IRIZAR

Bihar arratsaldean, zapatua, *Inaxitoren ametsak* antzezlan eskainiko du Trikuharri taldeak; 18:30ean izango da emanaldi hori, Olaranen. Hain zuzen, 6 eta 12 urte bitarteko neska-mutikoei zuzenduta dago antzerki saioa.

Udalak antolatuta eta Kutxak sustatuta, Trikuharri antzerki taldearen *Inaxitoren ametsak* antzezlan ikusteko aukera izango dute herriko neska-mutikoei bihar, zapatua, 18:00etan, Olaran etxeko aretoan.

Gorka Tolosa, Xabier Sukia eta Ibai Esoain dira Trikuharri taldeko aktoreak.

Hain zuzen, 6 eta 12 urte bitarteko umei zuzenduta dago Trikuharri taldearen antzerki saioa, eta Inaxito izeneko mutiko baten abenturak kontatzen ditu. Hurrengo egunean geografiako azterketa du Inaxitok, eta horregatik kezkatuta hartzen du loak mutikoa. Ametsetan, igel bat gidari duela, herrialde herrialde ibiliko da, munduan zehar; herrialde bakoitzean pertsonai berezi batekin topo egingo du eta abentura dibertigarriak bizi izango ditu Inaxitok.

Horrela, Inaxito eta bere lagun berrien eskutik, munduan zehar bueltatxo bat emateko aukera izango dute herriko neska-mutikoei zapatu arratsaldean.

Ikuskizunaren helburua da hizkuntzarekin gozatzea. Horrela, ipuinarekin eta txisteekin batera, bertsoak ere tartekatuko dituzte.

Gorkak, Xabierrek eta Ibaik, emanaldi honekin, umei irribarrea eragitea, imajinazioa bultzatzea eta eurekin oso lotuta dauden ikasketen mundua eurenganatzea lortuko dute bihar; gogoratu, 18:30ean izango da emanaldia, Olaran etxean.



Igela izango du gidari Inaxitok bere bidaian zehar.



Sanjosepe da kale berria

Azaroko osoko bilkuran, udalbatzarrak erabaki du Zurrategi eta Eguzki auzoen ostean osatu den kale berriaren izena: Sanjosepe izena, hain zuzen ere, izango du kale berri horrek.

Elkarri atxikitako hamahiru etxe familiabakar egin dituzte hantxe; aurreko asteo egubakoitzean eman zituen Udalak etxe horien dako beharrezko baimenak. Gauzak horrela, jabeak hantxe bizi izaten jartzeko moduan daude./A.I.

KIROLA

PARTIDUAK

FUTBOLA
Azaroak 27
15:30: Antzuola-Urki (2. erregionalak)

PILOTA
Azaroak 27 (Gipuzkoako Txapelk.)
16:30: Olalde-Añorga I (Kadeteak)
Ondoren: Olalde-Aretxabaleta (nag.)
Ondoren: Olalde-Altzarra III (paletaz)

EMAITZAK

FUTBOLA
Legazpiko 2 Antzuola 2 (2. erreg.)
Antzuola 1 Bergara 1 (Gazteak)
Antzuola 11 Urki 0 (Kadeteak)
Antzuola 0 Almen 1 (Neskak)
Antzuola 14 Urki 3 (Infantilak)

PILOTA
Gipuzkoako Kluben Arteko Txap.
Eskoriatza-Olalde (eskuz nag.) . 21-22
Elordi Herrigintza-Olalde (kad.) . 22-8
Olalde-Gazteleku (paletaz nag.) 27-35

LARREA

TABERNA

Kalebarren 17
ANTZUOLA

**MUJIKA
HARATEGIA**



**Berezitasunak:
Etxean hazitako
zekorrek eta oilaskoak**

Kalebarren, 1.
ANTZUOLA
Tf. 943 76 64 34

AITZ-GARBI



**taberna
jatetxea**

**Pintxoak eta
kazuelatxoak.
Bazkariak eta afariak**

Kalebarren 15. Tf. 943 78 70 51
ANTZUOLA

Tomas Gezalaga

**Zoruen kutxilatua
eta
bernizatzea**

Kalegoi 21
Tel.: eta faxa 943 76 64 07
Poltsikokoa 616 277 999
ANTZUOLA / BERGARA

Tomas Gezalaga

**Apainketarako eta
industriarako pinturak
Paper margotuak
Moketak eta tapizatuak**

Kalegoi 21
Tel.: eta faxa 943 76 64 07
Poltsikokoa 616 277 999
ANTZUOLA / BERGARA

**LEKY-BERRI
MERENDEROA**

**Janariak
eta
edariak**

Tf. 943 76 60 94
ANTZUOLA

EGAÑA

Era guztietako arotz lanak

**Tarima eta parketa jartzea
Zoruen kutxilatua eta barnizatuak**

Kalegoi 21, ANTZUOLA Tel.: 943 76 64 23



*Jose
Gomez
Abad*

Errekalde 6, 4-B.
Antzuola
943 76 60 19
943 76 60 43
Faxa:
943 76 60 19

INDUSTRI MANTENIMENDUA